

Tutu é kuvi ũun e táxnũu San Pablu iña Timóteu

Taxnũu Pablu tutú iña Timóteu

¹ Xu'u é Pablú u ne, pustru Jesúcrístú u, tsí kuan ō de kũ'vé Xuva kō, ña e nakáku ko, ni Jesúcrístu, ña é ntantétu ō. ² Taxnũu ú tutú sa'a iña o, Timóteu. Tsi divĩn é vata kaa i'xá ko kuenta iña Xuva ko, tsi kuĩnti'xe o Xuva ko kuēnta iña tú'ũn é kāka'án u ni ō. Na naxnuu viko Xuva ko ō. Na ntuntā'ví ini ña o. Na tā'xi ña é kutūvĩn va'an, divi ña nĩ Tó'o ko Jesúcrístu.

Kuenta tsí vii ña iña tukú nchu'un é ña te nuu é ntaā i

³ Vata tsī ó kaka'án u ni ō da ntíi ú kue'én u ñuú Macedoniá ne, kuan tsī ó kaka'án u ni ō vevii di: Kutūvĩn kan ñuú Efesu vata koo é ká'an ni ña tsíkān é ña ku kuan koo nakua'a ña ña'a tukú nchu'un. ⁴ Ká'an ni ña tē ña vii ña kuenta kuentu e ntáka'an ñá'a; ntē ña vii ña kuenta te dóo du'xen ká'an ñá'a kuentu ka'nu iña uváta kuē'en ña. Dotō tsi ntánāa núu ña'a kuenta iña i sá'ā ne, ña kaidiá'vi kue'en tsi é kāda ntaa o tsiñu e tá'xi Xuva kō é vīi o é kuĩnti'xe ko ña.

⁵ Kuān ó kaka'án u ni ō tsí ntio ko é kuĩnima kó ta'an ko kanĩ nima ko é vā'á o. Ntio ko é kūtuni ko tsí ña tuví nee nuu i é kĩni kaa nuu nima ko. Ntio ko é kuĩnti'xe nti'xe ko Xuva kō. ⁶ Iō ñá'ā é xtuyĩ mii ña núu i sá'a ne, dotō tsi ntánāa núu ña nuu i é ña kaidiá'vi. ⁷ Ncho vii ña mastrú lei iña Xuva ko, ntá tsi ña ini ña nee iña é ntáka'an ña; ntē ñá ĩni mii ña nee e ntánakua'a ña ña'a é vāta te dóo ini ña, kuini ña.

⁸ Ntá tsi xo'ō ne, ini ó tsi vá'ā leí san é kade tsiñu ni'i o, vata ō ntío Xuva kō da xtúvī ña. ⁹ Ini ó tsi ña ni xtuví Xuva kō leí san iña ña é vā'a, tsí iña ña ntáde é kīni kaa; iña ñā é ña ntáde ntaa; iña ñā é ña ntákuinti'xe i Xuva kō; iña ñā é kīni ntáa; iña ñā é iō kuetsí i; iña ñā e ntáka'an kīni iña Xuva ko; iña ñā e ntaé'ní di'i i ni uva ī; iña ñā e ntaé'ní ña'a di; ¹⁰ iña ñā e ntákidi ni'i tuku ñadi'i; iña ñā e ntáde kīni kaa ni ñatī ni'i ñā; iña ñā é ntadú'u; iña ñā vete; iña ñā é ntadá'vi ña'a dovete; iña ñā é ña ntío kue'en i nchu'un é vā'a. ¹¹ Nchu'un é vā'á san ne, ña'vi tū'ún va'a iña Xuva ko, ña e dóo ka'nu, ña'vi tū'ún va'a e téé tsiñu Xuva kō ko é kā'an ntódo u.

Nakué'e o sintiá'vi nta'a Xuva kō, tsi dóo vá'ā ó de ña ni kō

¹² Kanakué'e ú sintiá'vi nta'a Tó'o ko Jesūcristú, ña'vi ñā é xntíi ñā ko vata koo é kuvi víi u sá'ā. Tsí ña'vi ñā nakaxnúu ña ko é kāda tsiñu ú iña ña, tsí kada ntaá u, kuini ña. ¹³ Kuān te ntuvi dí'na ne, dóo kīni ka'án u iña ña; dóo dé xení u nī ña kuinti'xe i san, ntá tsi dé ka'nu iní Xuva ko nī ko, tsí ña ni kutūnī ko nee iña é edé u, tsí vata kuinti'xē kó ña kidaā. ¹⁴ Ntá tsi ña te nte kaa vá'a o dé Xuva ko nī ko. Tā'xi ña é kuinti'xe kó ña. Tā'xi ña é kuinimá ko ta'an kó di, tsí kuān ó kata'xi Jesucristu da kúvi uun tsi nima ko ni ña.

¹⁵ Tū'ún sa'á ne, nuu é ntāa ntí'xe ī e dóo nuu á'vi i é kuinti'xe un ntíi ntíi ña'a sán ne: Kī'xi Jesucristu ñuxiví sa vata koo é nākáku ña ña'a, ña é iō kuetsí i. Xu'ú ne, dií dií ka ka'nu kuetsí ko é un ntíi ntíi ña'a. ¹⁶ Ntá tsi di'na u ntúnta'ví ini Xuva kō kó e dií dií ka kīni kaa ú, vata koo é kué'é ña kutuni ña kuinti'xe i rkontuvi tsi dóo ki'in itō dé ka'nu ini Jesúsristu ní ko ne, kuan kōo ni'i ña é vā'á nta'a Xuva kō di, é kuntoo ña ni ña ntii dañu ntūvi. ¹⁷ Dukuān né, na

kūnuu ini ko Xuva ko, ña é odo nūú ntii dañu ntūvi. Ña kuví ka ña. Ña kúvi kīni o ña. Mii tsi ñā é Xuva kō. Ntii dañu ntuvi na kuiko ñu'u o ñā. Ká'an ō tsi dōo ka'nu ña. Kuan tsi koo na kōo.

¹⁸ Sá'a kakā'án u ni ō é vīin, i'xá ko Timoteu, vata tsí ó kaka'an ña'a kídaā, da tá'xi Espíritū Sántū é kā'an ñá kuenta iña o. Nanū'ún ini o tú'ūn é kākā'an ña. Koon ntiin kādan tsiñun iña Xuva ko.

¹⁹ Ñá xtuvī miin e kuínti'xe o. Ñá vīin nee nuu i é ñā vá'a kuiní nima o. Tsí iō ñá'a é ña ntáde ña kuenta é kākā'án nima ñá ne, xtuvī mii ñá e kuínti'xe ña ne, dukuān o nákunáa ña kúñu ñā. ²⁰ Kuan ō kúvi Himeneu ni Aléjandru. Ntādá u ña kuenta ntá'a tó'ō e ña vá'a vata koo é na kuiní ña é ña ka'an ntée ña Xuva kō.

2

Nté koo vīi o dá kākā'an ntá'ví ō

¹ Di'na sálā ntio ko é vīi o: Kákan o nta'a Xuva ko kuēnta iña un ntíí ntíí ña'a; ka'an ntá'ví ō ni ñā. Kákan o dā xe'e ntá'a Xuva kō ne, naku'é e o sintiá'ví nta'a ña kuenta iña ña'á san. ² Ka'an ntá'ví o iña ña tsíñu na'nu i ni ūn ntíí ntíí ña tsíñu i vata koo é vā'á koo kuntoo ō, é diin diin tsi kuntoo ō, da ntánuu iní ko Xuva kō, dá ntáde o da mii kuē'en tsi é vā'a. ³ Sá'ā é vā'a. Kuan koo e ntío Xuva kō é vīi o, xo'o é nakákú kō. ⁴ Tsí ntio ña é nākáku un ntíí ntíí ña'a; ntio ña é kūtú've ña nēe é nuu é ntaā i. ⁵ Tsí uun tsi Xuva ko ni uun tsi ñatīi, ña é kāntavá'a ko ni Xuva ko, ña é Jesucristu. ⁶ Di'vi ñā xe'é ña ntuvi iña ña e ntá'ví ña kuenta iña kuétsi ko ūn ntíí ntíí o. Ta'xi Xuva kō é kūtuni ko dá xēe ntúvi i. ⁷ Tā'xi ña é kā'an ntódo ú tú'ūn sa'a, é vīi u pustru ña. Nuu é ntaā i é kākā'án u, ñá tē dovete. Nākaxnúu ña ko é nañē'é u ña é ña te ña Israeé san nēe é nuu é ntaā i, é nañē'é u ña nté koo kuínti'xe ña Xuva kō.

⁸ Kidáā ne, da mí'ī ká nataká nuu ña'a, ntio ko é ká'an ntá'ví ñatī san; ntio ko é ntāa ni'i ña nta'a ña e dóo va'á, ñatī, ña é vā'á nima í, ña é ña ini kudlīn, ña é ña ini naa núu. ⁹ Ñadī'í san ne, ña ntio ko é vii ñá vata ó de ñadī'í ña nguii san é da mii tsi e ntaínuú ña oro ni xō'o kiti e dóo a'ví i ni dā'ma e dóo a'ví i dí ne, e dóo vá'ā ó ntánadaán ña lasun ña. Tsi kuān ó de ña vata koo é na kīnī ña'a san ñá ne, ká'an ñá tsi ña te nté kaa va'a ntāa ña. Tsi ntio ko é ká'an ña'a san tsi dóo va'á ña'a ñadī'í san, ¹⁰ tsi ntáde ña é vā'a, tsi sá'ā é vā'á koo vii ñadī'í, ña ntáka'an é ntánuu iní i Xuva kō. ¹¹ Diin diin tsi na kuntoo ña nakuā'a ña; na kuiko ñu'u ña. ¹² Ñá kaxe'é u itsi é nañ'e e ñadī'í san ña'a san má ūkún kán. Ñá vā'á o te vii ka'nu ñadī'í san iña ñatī san; diin diin tsi na kuntoo ña. ¹³ Tsi di'na de kú've Xuva ko Ādaán ne, da kidáā de kú've ñá Eva. ¹⁴ Tsi ña te Adaán san, ña e éni ntá'ví koó san, tsi ñadī'í san. Ne, divi ñadī'í san é edé ña kuétsī. ¹⁵ Ntá tsi kuān te dóo nto'o ñadī'í san dá kaku i'xá ña ne, nakakū ña kúñu ña tē ña xtuví mii ñá é kuinti'xe ña Xuva kō; te kuñima ñá ta'an ña; te vii ña é ntio Xuva kō; te kadā kuení va'a ñá; te vā'á koo vii ña.

3

Nté koo vii ña odo nūú ini ukún san

¹ Uun nuu é ntaā í: xóo ña'a é ntio i é kodo nūú ini ukún ne, uun tsiñu é vā'a é ntio ña. ² Ña odo nūú san ne, kantio é vā'á koo vii ña vata koo é ña ka'an ntée ña'a san ña. Uun tsi ñadī'í ñá koo. Kuenta tsi na vii ñá nee iña e ntáde ña. Na kadā kuení va'ā ñá nēe é vii ña. Vá'a koo na vii ñá vata koo é kuiko ñu'u ñá'a san ña. Vá'a koo na vii ñá nī ña kaxee kaito ni'ni ña ña nú vi'i ña. Vá'a koo na nakuā'a ña ña'a san. ³ Ñá ku de ki'vi ña. Ñá ku kada diin ña. Ntē ña ntio ña diu'un é vii ñá da nēe ka nuu i vata koo é

nĩ'i ña. Dõo vá'a koo na viĩ ñá ni ñā'a. Ñá nāa núu ña. Ñá ku itsu'ũn ña nté koo ni'i ñá diu'un. ⁴ Vá'a koo na kadā kú'vē ñá vi'i ña. Na viĩ ñá vata koo é na kuĩnti'xe i'xá ña ña, é kuiko ñu'u ñā. ⁵ Tē ñá ini ña nté koo kadā kú'vē ñá vi'i mii ñā ne, nté ntu koo kadā kú'vē ñá ini ukun Xúva kō. ⁶ Ña kúvi viĩ ñá te vata e ná'a kuĩnti'xe ña Xuva kō, vata koo é ña kadā kuení ña te dóo ka'nu ña'a ña ne, vata koo é ña ní'i ña é nto'o ña vatā o dé tó'ō e ña vá'ā san da dóo ka'nu ncho vii. ⁷ Kantio é kuiko ñu'u ñā'a ña, ña é vāta kuĩnti'xe i Xuva kō, vata koo é ña ka'an kíni ña iña ña, vata koo é ña ntava núu ña dei tó'ō e ña vá'ā san.

Nté koo viĩ ña'a, ña ntáde tsiñu ini ukun

⁸ Kuan koo na viĩ ña ntáde tsiñu ini ukún di. Vá'a koo na viĩ ñá vata koo é na kuiko ñu'u ñā'a ña. Ña kúvi ká'an ñá dovete. Ñá ku de ki'vi ña ntute tinti'ō. Ñá ku viĩ ñá da nēé ka nuu i vata koo é nĩ'i ñá diu'un. ⁹ Na kuĩnti'xe vá'a ña nchu'un e xtúvi Xuva kō é kuĩnti'xe kō ne, é ñni mii ña tsí ña tuví nee nuu i é ña vá'a e ntáde ña. ¹⁰ Koto nteé nto ña di'na. Tē ña tuví nee nuu i é kíni kaa iña ñá ne, kidáā ne, kuví vii ña tsiñu ukun. ¹¹ Ñadĩ'í san dí ne, vá'a koo na viĩ ñá vata koo é na kuiko ñu'u ñā'a san ñá di. Ñá ku ká'an ñá dovete iña tuku ñá'a. Kuenta tsí na viĩ ñá nee iña e ntáde ña. Na káda ntaa ña é un nti'í. ¹² Ña e ntáde tsiñu ini ukún san ne, uun tsi ñadĩ'í ñá na kōo. Na vā'á koo kadā kú'vē ñá iña i'xá ña ni vi'i ña. ¹³ Di'vi ña é vā'á o ntáde tsiñu ini ukún ne, dõo vá'a koo ka'an ñá'a iña ña. Kidáā ne, ñá kúka'an nuu kué'en tsí ña é ká'an ñá iña e ntákuĩnti'xe i Jesucristu.

Nuu i e tá'xi Xuva kō é kūtuni ko

¹⁴ Ntio ko é kí'in kantí'i ú kíkoto ní'ni ú o, ntá tsi kaka'an u ni o sá'á ¹⁵ vata koo é, te kūkuií ka kó ne,

kutuni o nté koo víi ña'a, ña e kúvi i'xá Xuva kō, ña ñu'u ini ukún Xuva kō, ña kantító san. Tsi ña sá'á ne, ntáxió ntii ña, ntánada'an ñā nchu'un é nuu é ntaā í iña Xuva ko. ¹⁶ Dōó ka'nu nti'xe nuu i e tá'xi Xuva kō é kūtuni ko:

Ntii dító Xuva kō é vata kaa ña'a kaa ña.

Kaka'an Espiritū Sántū tsi dóo va'á ña.

Ntaító ánjē san ña.

Ntáka'an ntódo ña'a san kuenta iña ña ni ña tuku ñúu.

Kuīnti'xe ña'a san ña dá kanii ñūxiví san.

Naki'i Xuva ko ñā e dukún kān.

4

Iō ña é xtuvī mii ña é kuīnti'xe ña

¹ Nā te xū'u o é kaka'an Espiritū Sántū san tsi da rkontuví koo ña'a é xtuvī mii ña é kuīnti'xe ña, tsi ntáde ña kuenta é kaka'an é ña vá'ā san dá kaeni nta'ví ña. Kuntikin ñā nchu'un iña é ña vá'ā san. ² Tekú ña nchú'un sá'a é ntáka'an ñā vete, ña é da mii xū'u i ntáka'an, tsi ña te ntánii nima i ntáka'an, ña é kuka'xi kué'en nima í vata tē i'xi, é ña kakutuní ka nima í nēe é vā'á, nēe é kīni kaa. ³ Nā tsikán ne, ntáka'an ñā tsi ña kuvi tánta'a o. Ntáka'an ñā tsi iō titín nuu i é ña kuvi ká'xi o. Ntá tsi de kú've Xuva kō sa'á iña ko. Xo'o e ntákuinti'xe ko, xo'o é ini ó nēe é nuu é ntaā í ne, na nākué'e o sintiá'vi nta'a ña kuenta iña i sá'a. ⁴ Tsi é un nti'i nuu i é edé kú've Xuva kō ne, vá'ā o. Nā kúvi ká'an ó te ña vá'a o. Kí'i o ne, nakué'e o sintiá'vi nta'a Xuva ko kuēnta iña i. ⁵ Tsi kaka'an Xúva kō tsi vá'a ne, nāxnuu viko ña é ká'xi o da nakué'e o sintiá'vi nta'a ña.

Ña e dóo vá'ā ó kade tsiñu iña Jesúcristu

⁶ Te nañē'en tá'an o nuu i sá'ā ne, é dōo vá'a viin iña Jesúcristu. Kae'nu é kákuinti'xe o dá

kanakuā'an tú'un Xuva ko, ðivī nchu'un ña é kantīkin.

⁷ Ntá tsi ña kún den kuenta é dotō tsi ntáka'an ñá tuntu, é ñā te íña Xuva ko. Nakua'an miin é vīn nēe é ntio Xuva kō. ⁸ Kaidiá'vi kudij uun da'na te vīi o é kāda tsiñu kúñu kō, ntá tsi dií dií ka kaidiá'vi te vīi o é ntio Xuva kō. Tsi sá'ā ne, kaidiá'vi ñi dukuan ntoo o ñūxiví sa ne, kaidiá'vi dá kuntoo o ni ñā kídaā di. ⁹ Nuū é ntaā í sá'a ne, dōo nuū á'vi é kuínti'xe un ntíí ntíí ña'a. ¹⁰ Dukuān ne, dōo ntii ntáde tsiñu o ne, ntánto'o kō e ntádē xení ña'a ni kō, tsí e kuínti'xe ko Xuva kō, ña kantíto, ña é kuvi nakāku un ntíí ntíí ña'a, nī ña é di ðivi kakuinti'xe i.

¹¹ Sá'a nakuā'an ña'a san. Ká'an ni ña te kuān koo vií ña. ¹² Ná ku dā vá'a o é kā'an ñá'a tsi ñá inin tsí dā vé ña kuetsīn. Vá'ā koo viin vata koo é nañē'en ña kuínti'xe i san nté koo vií ña dá kinī ña nté o kaka'án ne, nté o kaden utén uten, nté o kakuinima o tá'an o, nté o kakuinti'xe o Xuva kō ne, nté o kaden é vā'a. ¹³ Ñi dukuan kī'ín u mí tuvín ne, koon ntiin nakuā'an tú'un Xuva ko mē'ñú ña'a san, nañē'en ñá nēe é kāni tú'un ne, kué'en ñā itsi di. ¹⁴ Ná ku dā nēe inī ó xtuvín miin e tá'xi Xuva kō doméni é vā'á koo viin dá ka'an Espíritū Sántu kuēnta íña ñátā sán ura í da xntee tá'an ña nta'a ña ðiki o.

¹⁵ Dōo ntíto viin é un ntí'í nuū i sá'a. ðivi tsi vīn vata koo é kīni un ntíí ntíí ña'a tsí kakutú've o e dií dií ka vá'a viin. ¹⁶ Kuenta tsí viin nté o den, nté o kanakuā'an ña'a san. Koon ntiin é un ntí'í. Tsí te kuān koo viin ne, nakākún miin ne, kuan koo nakākún ña ntaíni é kaka'án di kuenta íña o.

5

Nté koo vií o ni tā'an ko, ña kuínti'xe i

¹ Nǎ ku dēn tǐn ni ñatā san. Ká'an ni ña dokoñu'u vata tsi te uva o ñā. Kuikon ñu'un ñatii kuetsī sán vata tsi te ēni o. ² Kuikon ñu'un ñadī'í ata san vata tsi te dī'í o ñā. Kuikon ñu'un ñadī'í kuetsi san vata tsi te tā'an o ña e dóo vá'a viín ni ñā.

³ Xntiin ñadī'í kií san, ña é kátaan núu nti'xe i. ⁴ Ntá tsi te ió i'xá ñadī'í kií san ne, o ió i'xa i'xá ña ne, dīvi i'xá san kaduku ntée é vīi é vā'a, é vīi kuenta dī'í i ni uva ī. Sá'ā é ntio Xuva kō é vīi o. ⁵ Dīvi ñadī'í kií, ña é da mii un diki, ña é xoxó kue'en tsi i'xá i ne, ini ña tsí mii tsi Xuva ko kaxntii ña ñā. Nté ntuvi nté níñu kaka'an ntá'ví ña, kaikan ñá nta'a Xuva ko nēe é kátaan núu ña. ⁶ Ntá tsi ñadī'í kií, ña é kade da mii é ntio miī né, vata tsi tē xi'í ñá, kuān te kantíto ká ña. ⁷ Ká'an ni ña nūu i sá'a vata koo é ña tuví nee nuu i é ká'an ntée ña'a ña. ⁸ Ntá tsi te xoó ña'a ña kade ña kuenta ñá'a ña ne, dií dií ka te ñavi'í mii ñā ne, é xtuví mii ña e kuínti'xe ña Xuva kō. Dií dií ka xii kaa íña ña é vata kaa uun ña'a, ña é ña ni kuínti'xe kue'en í Xuva kō.

⁹ Da miī é kuntéé dīvi ñadī'í san mí uve na'a ñadī'í kií tē é xee tá'an uní díko kuia ña, te uun tsi xii ña xio, ¹⁰ te ká'an ñá'a te dóo vá'ā o dé ña, tē nakue'nu vá'a ña i'xá ña, tē dóo vá'ā o dé ña ni ña xee ví'í ña, tē e náKate ña dī'in ña kuínti'xe i, tē e xntíi ñā ña ntánto'o i, tē edé ña é uun nti'í nuū i é vā'a.

¹¹ Ntá tsi ña xntéen na'an dīvi ñadī'í kií, ña é dā vé ñadī'í kuetsī, tsí te xtuví mii ña é káde tsiñu ña iñá Cristú tē ntio ña é nātánta'a xtuku ña ne, ¹² kidáā ne, ní'í ña é ntō'o ña tsí ña ni de ntáa ña é xe'é ña xu'u ña ni Xuva kō é vii ña. ¹³ Ne, ñá te da mii tsi sá'a, tsí kuiní ña é kudu'xen ña é káda tsiñu ña ne, da mii kuē'en tsi é kī'in ña ta'án vi'í ta'án vi'í. Ne, ñá te da mii tsí é kada du'xen ña, tsí kuiní ña é ká'an ñá dovete iña ta'an ña. Dá ncho kini nūu ña tsiñu iña ta'an ñá ne, ká'an ña nūu i é ña vá'ā o é ká'an

o. ¹⁴ Dukuān é ntio kó ne, na nātánta'a ñadĩ'i kii kuetsi san. Na kōo i'xá ña ne, na kuēnta víi ña víi ña. Kidáā ne, ñá vii ñá nēe nuu i é kā'an kīni ña'a san íña ña. ¹⁵ Tsí iō ña é xtuvī mii ña é vā'a e ntáde ña ne, é kuntikin ña tó'ō e ña vā'ā san ve.

¹⁶ Te uun ñadĩ'i, ña é kakuinti'xe i Xuva kō né, iō ñavi'i ña, ña é ñadĩ'i kii ne, ña kaduku ntée ña é xntii ña ñā. Kidáā ne, ñá dūku ntee un ntíí ntíí ña ñu'u ini ukún san é xntii ña ñā, vata koo é kuvi xntii ña ñadĩ'i kii, ña é xoxó ñavi'i i.

¹⁷ Kuikon ñu'un ñatā san, ña e ntádē kú'vē va'á ini ukún kān ne, dií dií ka kuikon ñu'un ña e ntáka'an ntódo tú'ūn va'á san nī ña ntánakuā'a ña'a sán di. ¹⁸ Tsí kaka'an tú'un Xuva kō: “Ña ku xnúun xo'o xu'u dūntikí san da ntaédín ti trigu”, ka'an. Ne, kaka'an xtúku: “Da mií é xī'i á'vi ña kade tsiñu”, ka'an.

¹⁹ Ña kún den kuēnta te tsi'i kuétsi ña'a uun ña'a ñatā sán tē xoxó uvi, uni ña'a, ña é ntāda ntaa é kaka'an ñá te nuu é ntaā i.

²⁰ Tē xoó ña'a, ña é kuan tsí o ntáde kuétsi sán ne, kadan tīn ni ña mē'ñu un ntíí ntíí ña'a, vata koo é ū'ví ña nguū san.

²¹ Ká'ān ú ni o nuu Xuva ko ni Jesūcristu ni ánje ñā, ña é nakaxnúu ña, te kadan ntaan é un ntí'i nūu i sá'a. Ña te úun tsi ñā'a é vā'á viin ni ñā, tsí uun kuédadií tsi. ²² Koton vā'ān dá kadān kú'vén iña ñātā, ña é kodo nūu ini ukún san, vata koo é ña viin dadīn ni tūku ña'a san núu i é kini kaa, tē ña te vā'á ña'a ñatā san. Ña kún den nēe nuu i é kīni kaa.

²³ Dīvīn ne, da xé da ta'an tsi kanguntii i'xí o ne, ña kó'ōn kán e dá mii ntute kuī, tsí ko'on kudiin ntute tínti'ó di vata koo é na ntūvā'a í'xi ō.

²⁴ Iō ñá'a ne, dōo dito é iō kuetsí ña di'na dá nī'i ña é ntō'o ña. Iō túku ña'a ne, dōo xu'u iō kuetsí

ña ne, da nté rkontûví kutuni ñá'a tsí iō kuetsí ña.
²⁵ Dadï tsi iō nuu i é vā'a e dōo ditó ne, iō tuku nuu
 i é vā'a é ña díto, ntá tsi ña kuvi kuxu'ú kue'en tsi.

6

¹ Tē xoó ña'a ña e ntáde tsiñu ne, na kuiko ñu'u ñā
 tó'o ñā, vata koo é ña ka'an kīni ña'a iña Xuva ko ni
 nchu'ún ña. ² Tē xoó ña'a iō tó'o ī ña kuinti'xe i ne,
 ñá ku xtuví mii ña é kuiko ñu'u ña ñā tsí e kúvi ña
 ta'an ña kuenta iñá Cristu. Ná'ā, tsi díi díi ka vá'a
 koo na kāda tsiñu ña iña ña, tsí kuinima ñá ña, tsí
 dadï tsi ntákuinti'xe ña Xuva ko nī tó'o tsiñu san.

Kuntōo vá'a o te kuinti'xe kō

Ká'an ni ñā'a sán, nakuā'an ña nuu i sá'a. ³ Tē xoó
 ña'a nakuā'a ña tuku nchu'ún, tē ña kákuinti'xe ñā
 tú'ún é nuu é ntaā i é kākā'an Tó'o ko Jesūcristú, tē
 ña kantíkīn ña nchu'un é kā'an Xúva kō é vīi ó ne,
⁴ dōo ka'nu ña'a ña, kuiní ña, ntá tsi ña te neé ini
 ña. Da mii kuē'en tsi é ntio ña é nāa núu ña nuu i
 é ña kuvi nantíko koó ña'a, e dōo ntio ña naa núu
 ña. Kidáā ne, kune'u iní ña. Nāa núu ña ni tā'an ña.
 Ká'an kīni ña iña ta'an ña. Kadā kuení kīni kaa ña
 iña ta'an ña. ⁵ Da mii kuē'en tsi é nāa núu ña ni tā'an
 ña, tsí kīni kadē kuení ña. Xtuví mii ña é kákuinti'xe
 ña é nuu é ntaā i. Dōo kue'e ní'i ña te kāda tsiñu ña
 iña Xuva ko, kuiní ña. Kiin nteén xion ña kuān ntāa
 san. ⁶ Kué'e nī'i nti'xe kó te kada tsiñu o iña Xuva
 ko, ntá tsi tē nuu e vá'a nima ko. ⁷ Tsí ña te neé
 kani'i ō dá xee o ñúxiví sa ne, ñá tē neé kuvi kuni'i
 o tē ntáka o ñūxiví sa di. ⁸ Te iō te ko'o, te kā'xi ó, te
 kunuu kutāvi ó ne, é divi tsīkan. ⁹ Ntá tsi divi ñā'a,
 ña e dōo ntio i é kūkuika ne, kade ña nuu i é īni ña
 tsí ña vá'a ne, ña kúvi ntiī ká ña, vata tsī ó kuvi kiti é
 tāvi ti ítō. Kade tuntu ñá nuu i é ncho víi ña ne, ñá
 katā'an í iña ña. Kunaá iña ña ne, kunaá mii ñā di.

¹⁰ Tē dóo ntio ko diu'ún ne, kidáa vīi o é un nti'i nūu i é kīni kaa vata koo é nī'i ko. Ió ña'a é ntántuku ñā diu'ún ne, xtuvī mii ña é kuinti'xe ña Xuva kō né, dōo ntánantō'o ña kúñu ñā.

Koo ntii o kāda tsiñu vá'a o kuēnta iña i é kuinti'xe kō

¹¹ Ntá tsi ñvīn é kādukun ntéen Xuva kō né, xtuvīn miin núu i tsíkan; kuntíkín nēe e vá'a, nēe e ntío Xuva kō. Kuinti'xe vá'a o. Kuinima ó ta'an o. Na kūtíi o nima ó kuntetun. Ña kún den kā'nun.

¹² Koon ntiin é na kuinti'xe vá'a o Xuva ko ūun tsi da nté nī'i o ntuví va'á iña o ntii dañu ntúvi. Dukuān e kána Xuva ko ō dá ntādan ntaan mé'ñū ña'a, ña é ini, tsí e kuinti'xe o Cristu. ¹³ Vi'a ve ne, nuu Xúva ko, ñā é kátá'xi ntuvi iña ko un ntíi ntíi ó, ni Jesūcristu, ña e dóo vá'a ka'an é nuu é ntaā í da ntitsí ña nuu Pílatú ne, ká'ān ú ni o ¹⁴ te kādan ntaan vātā ó ka'an Xúva kō é vīin. Ña kún den nté uun nuū i é kā'an ñá'a tē ña vá'a o. Kuan tsí koo viin un tsi da nte nainu xtuku Tó'o ko Jesūcristu. ¹⁵ Tsí tē xee ntúvi i ne, nainu ña é kīni o ña. Ñvī ñā e dóo va'á kue'en ña. Ñvī ña kadē kú've ña é un nti'í. Ñvī ñā é rei é odo nūu un ntíi ntíi rei iña ñúxiví san. Ñvī ñā é odo nūu ña é da xōo ka tó'o í. ¹⁶ Da mii tsi ñā é kāntíto ña ntii dañu ntúvi, é ña kuví ka ña. Kaxi'í nuu ká'nu ña vata kaa ntuve ñū'u. Ntē xoxó xee étsin i mí tuví ña. Nté uun ña'a vata kiní ña ña; ntē ña kivi kiní o ñā vevii. Na kuiko ñū'u ña'a ña. Na kodo nūu ñā kadā kú've ñā ntii dañu ntúvi. Kuan tsí koo na kōo.

¹⁷ Ká'an ni ña e dóo iō iña i ñúxiví sa tē ña víi ka'nu ña. Ná ku dē kuení ña te kúvi víi ña é un nti'í tsí iō diu'un ña. ¿Te kúnaá ntu? Ntá tsi na kuinti'xe ña Xuva kō, ña é kata'xi kō é un nti'í nūu i é kantio kō vata koo é ña te neé taan núu ko. Ntekú ka xtuku é katá'xi ña ko. ¹⁸ Ká'an ni ñā né, na víi ña é vā'a. Na kōo ntii ña é víi ñā nuu i é vā'á vata tsí ó kaxió ntii

ñā é kāde tsiñu ña é nī'i ñá diu'un. Ñá ku dē vīni ña ni tā'an ña; na kuinī ña é kuē'é ña dava iña ña ña e ntátaan núu i. ¹⁹ Kuan koo naxtūví va'ā ña dokuika iña ña é ña kantí'i iña ntuvi iña ña é vē'xí, vata koo é nī'i ña ntúvi vā'á iña ñá rkontuvi.

I'a ntí'i tūtú iña Timóteu

²⁰ Timoteu, vānchu'un vīn kuenta nuu i e tá'xi Xuva kō é vīn. Ña kún den kuēnta dá doto tsi ntáka'an ñá'a da ntáka'an ntée ña é nuu é ntaā i, tsi dóo ini ña, ka'an ña; ntá tsi ñá ini ntí'xe ña. ²¹ Iō ñá e ntántikin ña sá'ā né, kūdana ña é ntákuinti'xe ña.

Na naxnuu viko Xuva ko nto ūn ntíí ntíí nto.

**Tū'ún xuva kō vatā ó ntáka'an ña ñuú
Coatzospan
New Testament in Mixtec, Coatzospan
(MX:miz:Mixtec, Coatzospan)**

copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Coatzospan

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

8f775598-56d9-56fd-966e-15e054d2f275